

dern auch an demselben die Gnade Gottes erkant/ gerühmet vnd geliebet/ vnd allezeit mehr auff Geschicklichkeit vnd Tugend gesehen/ als was sonst von hochtrabenden vnd ehrgeitzigen/ vnd ruhmräthigen/ vnd dergleichen Leuten pfleget hoch gehalten zu werden. Der Friedfertigkeit hat er sich allezeit befliesen/ vnd dafür gehalten/ ein Christ müste dem Frieden nachjagen/ vnd denselben mit jederman/ so viel möglich/ halten/ vnd sich jederzeit dahin bearbeitet/ wie er mit seinen Herren Collegen nicht allein in rechter vngefärbter Einigkeit leben möchte: Sondern wann vnter Geistlichen vnd Weltlichen Mißverstände vnd Jrrungen erwachsen/ zu gütlicher hinlegung vnd vergleichung derselben/ sich als einen Mediatoren vnd Mittler/ mit höchster Discretion vnd glücklichem success gerne gebrauchen lassen.

[Lijj r] Vber diß hat er sich sehr mässig erzeiget in Essen vnd Trincken/ auch in den bewegungen seines Gemüths sich bey jederman so moderat gehalten/ daß er nicht leichtlich zu Zorn vnd Zwietracht anlas gegeben/ vnd dannenhero allen animositeten vnd passionibus je vnd allewege sehr feind gewesen.

Gleich wie er auch die Gerechtigkeit geliebet/ vnd einem jeglichen/ was gleich vnd recht gewesen/ gerne wiederfahren lassen: Also hat er sich auch leutselig vnd freundlich erzeiget/ vnd insonderheit seine Lust vnd Frewde gehabt/ mit gelehrten qualificirten, so wol Geistlichen als Weltlichen/ zu conversiren, wie ichs dann nicht für eine geringe Glückseligkeit von der Zeit an meiner anwesenheit gehalten/ daß ich seiner anmutigen vnd erbawlichen conversation in Gesundheit vnd Kranckheit/ zu meinem grossen Frommen/ geniessen können.
[...]

[Lijj v] [...] Gleich wie aber David sich zu GOtt gewendet/ vnd jhm sein Noth vnd Anliegen geklaget/ sich auff GOttes Barmhertzigkeit gegründet/ jhn umb gnädige Verzeihung aller seiner Sünden vmb des thewren Verdienstes Christi willen/ geflehet vnd angeruffen/ auch vmb fristung seines Lebens/ damit er bey der Gemeine GOttes/ vnd in dem grossen Rath der Frommen/ seine Ehre außbreiten/ vnd durch sein Exempel seine Vnterthanen noch länger erbawen möchte/ vnd auch von GOtt ist erhöret worden: Also ist vnser Herr Hoffmeister Sel. in die löbliche Fustapffen des Davids getreten/ sich zu GOtt dem Allerhöchsten/ welcher Todt vnd Leben/ Gesundheit vnd Kranckheit in seiner Hand hat/ mit einem andächtigen Gebet/ vnd hertzlichen Seuffzen gewendet/ vnd dadurch nicht allein Vergebung aller seiner Sünden aus Gnaden erlanget/ sondern auch offtmahl von sehr schweren Kranckheiten/ als Stein vnd Podagra/ insonderheit aber von dem halbjährigen gefährlichen Magenwehe/ Vndäw-[Lijj r]ligkeit vnd Eckel/ daran er sich Anno 1628. so kranck befunden/ das er sich fast selbst des Lebens erwogen/ durch GOttes sonderbare Hülff errettet/ vnd noch biß in das 8. Jahr die erlängerung desselben erhalten.

Mitler zeit hat der Herr Hoffmeister Sel. wegen des Steins/ Podagræ vnd Mali hypochondriaci, viel gefährliche vnd beschwerliche Kranckheiten außstehen müssen/ vnd sonderlich vergangenem Herbst des verwichenen 1635. Jahrs/ da er wiederumb eine gantz gefährliche vnd tödtliche Kranckheit außgestanden/ also daß auch männiglich an seinem Leben desperiret, vnd schon von vielen für Todt gehalten worden/ Aber der allerhöchste GOtt hat jhm auch dasselbe mal seiner